




საშურის მოახლა



№12 (386)

3 აპრილი, ორშაბათი, 2023 წელი

საკრებულოს რიგგარეშე სხდომა



27 მარტს, გადაუდებელი აუცილებლობიდან გამომდინარე, საშურის მუნიციპალიტეტის საკრებულოს სხდომა გაიმართა, რომელსაც საკრებულოს თავმჯდომარე ნინო ლიპარტელიანი უძღვებოდა.

საკრებულომ, ხმათა უმრავლესობით, დამტკიცა დადგენილების პროექტი „საშურის მუნიციპალიტეტის მერიის მიერ მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ საშურის მუნიციპალიტეტის მერიის ზედამხედველობის სამსახურისათვის ამ სამართლებრივი აქტის შესრულების კონტროლის განხორციელების წესის დამტკიცების შესახებ“.

საქართველოს კანონმდებლობაში განხორციელებული ცვლილების თანახმად განისაზღვრა მშენებლობის საჯარო ზედამხედველობის ორგანოს ვალდებულება მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ ამ აქტის შესრულების კონტროლის მიზნით მუნიციპალიტეტის საკრებულოს მიერ დადგენილი წესით, არანაკლებ თვეში ერთხელ შეამოწმოს შესაბამისი მშენებლობა. ამავე ცვლილებით მუნიციპალიტეტების საკრებულოებს დაევალიათ 2023 წლის 1 აპრილამდე დაადგინონ საქართველოს სივრცის დაგეგმარების არქიტექტურული და სამშენებლო საქმიანობის კოდექსით გათვალისწინებული წესი.

იმავე სხდომასზე საკრებულომ მოისმინა სოფლის მეურნეობის საშურის საინფორმაციო-საკონსულტაციო ცენტრის უფროსის ჯემალ გელაშვილის ინფორმაცია სოფლის მეურნეობის მიმდინარე პროგრამების შესახებ.

სურამში ინფრასტრუქტურული პროექტები კვლავ გრძელდება

სურამში, ბარათაშვილის ქუჩის რეაბილიტაციის პროექტი აქტიურ რეჟიმში მიმდინარეობს. პარალელურად, აღმაშენებლის ქუჩაზე ორმოული შეკეთება ხორციელდება.

სამუშაოების მიმდინარეობა საშურის მუნიციპალიტეტის მერმა თენგიზ ჩიტიაშვილმა, მოადგილე ზვიად ქურდაძესთან და ინფრასტრუქტურის სამსახურის ხელმძღვანელ გიორგი პაპიაშვილთან ერთად დაათვალიერა.

ბარათაშვილის ქუჩის რეაბილიტაციის პროექტი, რომლის განხორციელების შედეგად 200-ზე მეტი ადგილობრივის გადაადგილების პირობები გაცილებით უსაფრთხო და კომფორტული გახდება, ადგილობრივი ბიუჯეტის დაფინანსებით ხორციელდება. მისი ღირებულება 84 777 ლარია.

მუნიციპალიტეტის მერის განცხადებით, სურამში ქუჩების რეაბილიტაციის პროცესი, სხვა ინფრასტრუქტურულ პროექტებთან ერთად, შეუქცევადად გაგრძელდება, რაც ხელს შეუწყობს დაბაში ტურიზმის განვითარებას და სარგებელს მოუტანს ადგილობრივ მოსახლეობას.



საშურის მუნიციპალიტეტში სკვერების, მინისტადიონების და სხვა დასასვენებელი სივრცეების მოწყობა აქტიურ რეჟიმში მიმდინარეობს.



საშურის მუნიციპალიტეტის მერმა თენგიზ ჩიტიაშვილმა მოადგილე ზვიად ქურდაძესთან და ინფრასტრუქტურის სამსახურის ხელმძღვანელ გიორგი პაპიაშვილთან ერთად სურამში, 9 აპრილის ქუჩაზე სკვერი და მინისტადიონი, ასევე საშურში, ფარნავაზის ქუჩაზე სკვერი და მინისტადიონი დაათვალიერა.

დაბა სურამში სკვერის მოწყობის პროექტი ადგილობრივი ბიუჯეტის სახსრებით განხორციელდა. პროექტის ღირებულებამ 263935 ლარი შეადგინა. ადგილობრივი ბიუჯეტის მხარდაჭერით მოეწყო სკვერის მიმდებარე

მინისტადიონიც, რისთვისაც 119 919 ლარი დაიხარჯა.

ადგილობრივმა ბიუჯეტმა დააფინანსა საშურში, ფარნავაზის ქუჩაზე სკვერის რეაბილიტაცია. პროექტის ღირებულებამ 259 457 ლარი შეადგინა. 114 920 ლარი დაიხარჯა ფარნავაზის ქუჩაზე, სკვერის მიმდებარე მინისტადიონის მოწყობისთვის.

სკვერების, მინისტადიონების და დასასვენებელი სივრცეების მოწყობა მუნიციპალიტეტში ხელს უწყობს ცხოვრების ჯანსაღი წესის დამკვიდრებას და ტურიზმის ხელშეწყობს ერთ-ერთ დამატებით ფაქტორსაც წარმოადგენს.

ძალიან სასიამოვნოა, რომ როგორც საშურში, ისე სურამში სკვერები და მინისტადიონები ბავშვებით, ახალგაზრდებით, ყველა თაობის წარმომადგენლებით სავსე დაგვიხდა. მიხარია, რომ მოქალაქეები აქტიურად სარგებლობენ მუნიციპალიტეტის მიერ მოწყობილი ინფრასტრუქტურით. ჩვენ ინტენსიურად ვაგრძელებთ საქმიანობას ამ მიმართულებით. აქტიურად მიმდინარეობს საშურში, ტაბიძის ქუჩაზე, სკვერის მოწყობის, ასევე ზემო სერის ტყე-პარკის რეაბილიტაციის სამუშაოები. მიმდინარეობს ასევე სურამის ცენტრალური სკვერის პროექტირება.

ასე რომ, მუნიციპალიტეტს უახლოეს მომავალში ცხოვრების ჯანსაღი წესის და აქტიური დასვენების ხელშეწყობადად არაერთი სივრცე შევამატებ, - აღმაშენებლის მუნიციპალიტეტის მერმა თენგიზ ჩიტიაშვილმა.



ხაშურის მუნიციპალიტეტის საკრებულოს დადგენილება #6 2023 წლის 27 მარტი

ხაშური

ხაშურის მუნიციპალიტეტის მერიის მიერ, მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ, ხაშურის მუნიციპალიტეტის მერიის ზედამხედველობის სამსახურისათვის ამ სამართლებრივი აქტის შესრულების კონტროლის განხორციელების წესის

დამტკიცების შესახებ

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის მე-2 პუნქტის, საქართველოს კანონის „საქართველოს სივრცის დაგეგმარების, არქიტექტურული და სამშენებლო საქმიანობის კოდექსში ცვლილების შეტანის შესახებ“, საქართველოს კანონის „საქართველოს სივრცის დაგეგმარების, არქიტექტურული და სამშენებლო საქმიანობის კოდექსის“ 136-ე მუხლის მე-4 ნაწილის შესაბამისად, ხაშურის მუნიციპალიტეტის საკრებულო ადგენს:

მუხლი 1

დამტკიცდეს „ხაშურის მუნიციპალიტეტის მერიის მიერ, მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ, ხაშურის მუნიციპალიტეტის მერიის ზედამხედველობის სამსახურისათვის ამ სამართლებრივი აქტის შესრულების კონტროლის განხორციელების წესი“ დანართის შესაბამისად.

მუხლი 2

დადგენილება ამოქმედდეს 2023 წლის 1 აპრილიდან.

ხაშურის მუნიციპალიტეტის საკრებულოს თავმჯდომარე ნინო ლიპარტელიანი

დანართი

ხაშურის მუნიციპალიტეტის მერიის მიერ, მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ, ხაშურის მუნიციპალიტეტის მერიის ზედამხედველობის სამსახურისათვის ამ სამართლებრივი აქტის შესრულების კონტროლის განხორციელების წესი

მუხლი 1. რეგულირების სფერო

1. „ხაშურის მუნიციპალიტეტის მერიის მიერ, მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ, ხაშურის მუნიციპალიტეტის მერიის ზედამხედველობის სამსახურისათვის ამ სამართლებრივი აქტის შესრულების კონტროლის განხორციელების წესი“ (შემდგომში – წესი) არეგულირებს ხაშურის მუნიციპალიტეტის მერიის ზედამხედველობის სამსახურის მიერ (შემდგომში – ზედამხედველობის სამსახური) 2023 წლის 1 აპრილიდან საქართველოს კანონის „საქართველოს სივრცის დაგეგმარების, არქიტექტურული და სამშენებლო საქმიანობის კოდექსის“ 127-ე მუხლის პირველი ნაწილის საფუძველზე მიღებული მშენებლობის შეჩერების შესახებ ადმინისტრაციულ-სამართლებრივი აქტის (შემდგომში - მშენებლობის შეჩერების შესახებ ადმინისტრაციულ სამართლებრივი აქტი)

შესრულების კონტროლის განხორციელების წესს.

2. მშენებლობის შეჩერების შესახებ ადმინისტრაციულ-სამართლებრივი აქტის მიღების შემდეგ ამ სამართლებრივი აქტის შესრულების კონტროლის მიზნით ადმინისტრაციული წარმოების განხორციელება, ადმინისტრაციულ-სამართლებრივი აქტის გამოცემა და გაცნობა ხდება მოქმედი კანონმდებლობის და ამ წესის საფუძველზე.

მუხლი 2. მშენებლობის შეჩერების შესახებ ადმინისტრაციულ-სამართლებრივი აქტის შესრულების კონტროლის წესი

1. ზედამხედველობის სამსახური ვალდებულია მშენებლობის შეჩერების შესახებ ადმინისტრაციულ-სამართლებრივი აქტის კანონიერ ძალაში შესვლის შემდგომ, ამ სამართლებრივი აქტის შესრულების კონტროლის მიზნით, არანაკლებ თვეში ერთხელ შეამოწმოს შესაბამისი მშენებლობა.

2. ზედამხედველობის სამსახური ვალდებულია აწარმოოს შესაბამისი საინფორმაციო ბაზა/რეესტრი, რომელშიც ასახული იქნება ის ობიექტები, რომელთა მშენებლობა კანონმდებლობით დადგენილი წესით ხაშურის მუნიციპალიტეტის მიერ შეჩერებულ იქნება 2023 წლის 1 აპრილიდან.

3. ზედამხედველობის სამსახური ვალდებულია ამ მუხლის მეორე პუნქტში მითითებული საინფორმაციო ბაზის/რეესტრის წარმოების პროცესისათვის გამოიყოს შესაბამისი პასუხისმგებელი პირ(ებ)ი.

4. ამ მუხლის პირველი პუნქტით განსაზღვრული მშენებლობის შემოწმება გულისხმობს ზედამხედველობის სამსახურში დასაქმებული საჯარო მომსახურეების მიერ, მშენებლობის შეჩერების შესახებ ადმინისტრაციულ აქტში მითითებული შეჩერებული სამშენებლო სამუშაოების გაგრძელების ან სამართალდარღვევის აღმოფხვრა/გამოსწორების შემოწმებას.

5. ამ მუხლის მეოთხე პუნქტში მითითებულ შემოწმების პროცესში, აუცილებელია გადაღებულ იქნას ობიექტის ფოტოსურათები, რომლებზეც მითითებულ უნდა იქნას გადაღების თარიღი და შედგენილ იქნას დათვალიერების ოქმი, რომელშიც უნდა აისახოს შეჩერებული სამუშაოების გაგრძელების ან სამართალდარღვევის გამოსწორება/აღმოფხვრის ფაქტი.

6. დათვალიერების ოქმი უნდა შედგეს სათანადო წესით და მოეწეროს ხელი ზედამხედველობის სამსახურში დასაქმებული შესაბამისი პირ(ებ)ის მიერ, რომელიც პასუხისმგებელია დათვალიერების ოქმში მითითებული ინფორმაციის სისწორეზე. შესაძლებელია დათვალიერების ოქმზე, ასევე, დაფიქსირდეს სამართალდამრღვევი პირის ხელმოწერაც, რომლის არარსებობამაც არ შეიძლება ეჭვქვეშ დააყენოს ოქმში მითითებული ინფორმაციის სისწორე.

7. მშენებლობის შეჩერების შესახებ ადმინისტრაციულ-სამართლებრივი აქტის შეუსრულებლობის შემთხვევაში, ზედამხედველობის სამსახური იწყებს სამშენებლო სამართალდარღვევის საქმისწარმოებას მოქმედი კანონმდებლობის შესაბამისად და ხაშურის მუნიციპალიტეტის მერია იღებს ადმინისტრაციულ-სამართლებრივ აქტს მშენებლობის შეჩერების შესახებ ამ ადმინისტრაციულ-სამართლებრივი აქტის შეუსრულებლობის შესახებ, რომელიც აღსასრულებლად მიექცევა კანონმდებლობით დადგენილი წესით.

8. ამ მუხლის მეშვიდე პუნქტში მითითებულ შემთხვევაში, ზედამხედველობის სამსახური ვალდებულია ამ მუხლის პირველ პუნქტში განსაზღვრული პერიოდულობით განხორციელოს ობიექტის შემოწმება.

9. იმ შემთხვევაში, თუ ობიექტის გადამოწმებით დადგინდა, რომ აღმოფხვრილია მშენებლობის შეჩერების შესახებ მიღებულ ადმინისტრაციულ-სამართლებრივ აქტში მითითებული სამშენებლო სამუშაოების შეჩერების საფუძველი, ხაშურის მუნიციპალიტეტის მერია გამოსცემს ადმინისტრაციულ-სამართლებრივ აქტს მშენებლობის შეჩერების შესახებ შესაბამისი ადმინისტრაციულ-სამართლებრივი აქტის ძალადაკარგულად გამოცხადების შესახებ მოქმედი კანონმდებლობის შესაბამისად.

10. ამ მუხლის მეცხრე პუნქტით განსაზღვრულ შემთხვევაში, ამ მუხლის პირველი პუნქტით განსაზღვრული ზედამხედველობის სამსახურის ვალდებულება არ ვრცელდება ამგვარი ობიექტების მიმართ.

ხაშურის მუნიციპალიტეტის მერიაში, ქალაქ ხაშურში, დიმიტრი ყიფიანის ბიუსტის განთავსების შესახებ იმსჯელეს

სპეციალური კომისია მუნიციპალიტეტის მერის - თენგიზ ჩიტაშვილის ხელმძღვანელობით გაეცნო ბიუსტის ესკიზს, რის შემდგომაც დიმიტრი ყიფიანის სახელობის სკვერში ბიუსტის განთავსების სავარაუდო ადგილიც მოინახულა.

აღსანიშნავია, რომ კომისიის საქმიანობაში მუნიციპალიტეტის მერიის შესაბამისი სამსახურების, ხაშურის სამუზეუმო გაერთიანებისა და სახელოვნებო წრეების წარმომადგენლებთან ერთად აქტიურად ჩართულნი არიან დიმიტრი ყიფიანის შთამომავლები.

ასე, რომ წელს, ზაფხულისათვის, ქალაქის ცენტრალურ სკვერს დიდი ქართველი მამულიშვილის და წმინდანად შერაცხული დიმიტრი ყიფიანის ბიუსტი დაამშენებს.



ქველმოქმედება და ... მადლიერება

ქველმოქმედება ერთ-ერთი ყველაზე ღირსეული საქციელია იმ უთვალავ საქციელთა შორის, რასაც ადამიანი, საბედნიეროდ, თუ სამწუხაროდ, ყოველ ნაბიჯზე სწადის. სამწუხაროდ-მეთქი, იმიტომ ჩავურთე ნათქვამს, რომ ადამიანის ნამოქმედარ-ში ღირსეულზე მეტი უღირსი საქციელი ჩანს, ასეა ეს და, მითუმეტეს ჩვენს დროში, ამაზე დავა-კამათიც კი სრული უაზრობაა ...

ჰო, და ამ უღირს დროში, ღირსეულ საქციელთა შორის გამორჩეულად ღირსეული ნამოქმედარის დაუნახობა და მადლიერების გამოხატვის დაყოვნება დიდი უზნეობა და ბოროტი შურის აშკარა გამოხატულებაა, უთუოდ.

ქველმოქმედება ყველას არც მოეთხოვება და არც შეუძლია, რადგან სიჭკველე მამაცობის სინონიმია და შეუძლებელია, მამაცობა ყველას ახასიათებდეს, სიმამაცე რჩეულთა ღვთისმშობლებული თვისებაა და მამაცური მოქმედება, ანუ ქველმოქმედება მხოლოდ ერთეულებს ხელეწიფებათ.

არავის იმის ახსნა არ სჭირდება, რომ ქველმოქმედება ვინმესადმი უანგარო დახმარებას, ან რაიმე საზოგადო საქმეში ასევე უანგაროდ შეტანილ წვლილს გულისხმობს, აი, ისე, როგორც ერთ ქართულ ისტორიულ მორალურ სენტენციაში: „მადლი ჰქენი, ქვას დადვი, გაივლი და წინ დაგზვდება“. რა დახვდება წინ მადლის მქმნელს, ნეტავი? მადლი? არა! ხალხური სიბრძნე იმას გულისხმობს, რომ იმან, ვინც მადლი მიიღო, მადლიერება უნდა დაახვედროს ქველმოქმედს, ადამიანის მოვალეობაა ეს, თორემ ქველმოქმედი არაფერს ითხოვს მის მიერ ქმნილი მადლის სანაცვლოდ.

რა თქმა უნდა, ადამიანი სოციალური არსებაა და მოვალეობაც სოციალურია, საზოგადოებრივი მოთხოვნით განპირობებული, რასაც ზოგი ასრულებს, ზოგი - არა. მადლიერების გამოხატვა თუ მოვალეობად მიიჩნე, მაშინ შეიძლება, მიზეზთა გამო, კიდევაც დაგავიწყდეს იგი: ამ გულმავიწყობამ შეიძლება, უხერხულ მდგომარეობაში ჩაგაგდოს. ამიტომ, მოვალეობა კი არა, მადლიერების გრძნობა უნდა ჰქონდეს კაცს. ქველმოქმედების უნარიცა და მადლიერების გრძნობაც ღვთიურია, რაც ყველა ცოცხალ არსებას აქვს: ცხოველებს, ფრინველებს, მცენარეებსაც კი. ცხოველებმა რომ მადლიერების გამოხატვა იციან, ნეტავი, ადამიანმა იცოდეს ისე. მშვერ მადლს ერთი ლუკმა პური რომ გადაუგდო, წლების შემდეგაც გავიხსენებს და კეთილგანწყობას შემოგავებებს.

ადამიანმა თვითონ თუ არ განიცადა ტკივილი და სიხარული, სიკეთის ქმნის სიხარული ან მის მიმართ გაკეთებული სიკეთის მადლი ან მის მიერ გაკეთებული სიკეთის შედეგი - უმადურობა, ისე ბოლომდე ვერ გაიგებს, ვერ ჩასწვდება მადლისა და უმადურობის ემოციური ზეგავლენის ძალას, გრძნობისმიერ შრეებსა და დანაშრეებს.

მე განვიცადე ის, რაზეც ახლა ვილაპარაკე, სამწუხაროდ, თუ საბედნიეროდ! სამწუხაროდ-მეთქი რომ ვთქვი, გასაგებია, ალბათ, ყველასათვის, მაგრამ ბევრმა შეიძლება, ვერ გაიგოს საბედნიეროდ - მეთქი რატომ მივაყოლე ნათქვამს: იმიტომ, მეგობრებო, რომ მაშინ, როდესაც სრულიად მოულოდნელად, გამართული ორსართულიანი სახლი ცეცხლის სტიქიამ შთანთქა მთელ ჩემს ავლადიდებსაგან ერთად, ღია ცის ქვეშ დავრჩი და პირველად ჩემს სიცოცხლეში ისეთი უმწეო ვიყავი, რომ არ ვიცოდი, რა მექნა, ასევე მოულოდნელად, ჩემს გვერდით გაჩნდა ახალგაზრდა კაცი, რომელმაც ჩემი მწუხარება კი არ გაიზიარა, არამედ თითქოს ჩემი მდგომარეობა შემურდაო, მითხრა: „უფაღს ყვარებისხარ ასეთი განსაცდელი რომ მოგვივლინაო, ღმერთი ისეთ სიძნელეში არ ჩაგადებს კაცს, რომლის დაძლევის ძალასა და საშუალებასაც არ მისცემსო. მხოლოდ გასაჭირში ჩავარდნილი კაცი გაიგებს, რა არის მადლი და როგორ უნდა მიიღოს და დაინახოს მოყვასის თანადგომა და იგრძნოს მადლიერებით გამოწვეული სიხარული და იმედი.

ამას ის ახალგაზრდა კაცი ღიმილითა და სხივმომფინარე თვალებით მეუბნებოდა.


ეს კაცი ჩემი ახალგაზრდა მეგობარი გელა გელაშვილი იყო. არ ვიცი, რა მოხდა, სიტყვით ვერ გადმოვცემ მაშინდელი ჩემი მყისიერი მეტამორფოზის ფაქტს, მაგრამ ერთბაშად შევიცვალე, იმედი, მხნეობა, უახლესი პერსპექტივა, მოქმედების გეგმა და რწმენა ერთბაშად „დამატყდა“ თავს. არც ის დამვიწყნია, რომ უნიკალური ბიბლიოთეკა, არქივი, საოჯახო ფოტოალბომები, ახლადდამთავრებული წიგნის ხელნაწერის (ალარაფერს ვამბობ ჩემს პირად თუ ოჯახისათვის აუცილებელ ნივთებზე)

ცეცხლმა შთანთქა. ეს დანაკარგი თითქოს ჟანგიანი ორშაურიანის ფასისა იყო. ახლა „ხვალე“ გახდა ჩემთვის მთავარი, როცა მანამდე ყველაზე ძვირფასი ჩემთვის წარსული იყო!

მე იმ ახალგაზრდისათვის არ მითქვამს ეს, რადგან ჩავთვალე, რომ იმ კაცის ერთ ზეგარდმო მადლს ვეზიარე. დიდება უფაღს!

იმ დღესვე ჩემს გვერდით გაჩნდნენ: ნათესავები, მეგობრები, ნაცნობები და სრულიად უცნობებიც. იმავე დღეს ჩემი ყოფილი ასპირანტის მამამ ბინა შემომთავაზა ხაშურის ცენტრში, ასევე შემომთავაზა ბინა ჩემმა მეგობარმა და მეზობელმა, რომლებსაც გულითადი მადლობა გადავუხადე, საცხოვრებლად კი ჩემმა მძახალმა წამიყვანა თავისთან, სადაც წელიწადზე მეტხანს ვცხოვრობდი, როგორც საკუთარ სახლში.

მეორე დღესვე დაიწყო მოქმედება იმ ხილულმა და უფრო კი უხილავმა ძალამ, რომელიც ღვთის მადლით იყო ცხებული: გამოჩნდნენ ქველმოქმედები, ენ-



თუზიასტები, მოხალისეები და ... ახლა მიკვირს, როგორ შეწყობილად მუშაობდნენ ეს ერთმანეთისთვის ძირითადად უცნობი ადამიანები, თითქოს ორგანიზებული სამშენებლო ორგანიზაცია იყო. თავისი სამუშაოთა მწარმოებლით, არქიტექტურით, მომარაგების სისტემით ... ხაშურის მერი და მისი აპარატიც შეწუხებული იყო და რაც სახელმწიფო ორგანოს შეეძლო, დახმარება გაძიწიეს. მადლობელი ვარ მათი და არც არასოდეს დავივიწყებ.

დიდხანს ვიფიქრე, როგორ გამომეხატა ჩემი მადლიერება იმ ქველმოქმედებისათვის, რაც, მართლაც, ფასდაუდებელია ჩემთვის. საქმე ამ ქველმოქმედთა მიერ გაწეული დანახარჯის მოცულობა კი არ არის (რაც, ცხადია, მნიშვნელოვანია), არამედ ზნობრივი მრწამსი, რომელიც გაკრისტალბებულია თითოეულ მათს ნაბიჯში, თუნდაც იმ მატერიალურ ნივთებში, რაც ჩემთან მოდიოდა მათი გამოგზავნების ვინაობისა და სადაურობის გაუმჟღავნებლად. თუმცა, ღვთის მადლით, ყველა მათგანი (ან თითქმის ყველა მათგანი) ვიცი და ვაფასებ.

ახლა რასაც ვიტყვი მადლიერების გამოხატვულ რიტორიკასთან, შეიძლება, შეუთავსებლადაც კი მოგეჩვენოს, მაგრამ გურამიშვილისა არ იყოს, „ავს თუ ავი არ ვუწოდე, მაშინ კარგსა რა დავარქო“. „ჰო, და სახლი რომ დამეწვა, როგორც უკვე ვთქვი, ჩემმა მძახლებმა თავისთან წამიყვანეს ბორჯომში. გაპარტახებულ სახლ-კარს, ბუნებრივია, ტურები შეესოლდნენ და რაც მეზობლებს ვერ ან არ მიეპარე, აღარ შემარჩინეს, განსაკუთრებით ის, რაც რკინისა ან რკინანარევი იყო „წუთისოფელი ომია, ომი ფუტკრის და კრაზანის“. ისე, რომ იმ ბევრ „ფუტკართან“ ერთად „კრაზანაც“ გამოჩნდა, თუმცა კეთილმა სძლია, ღვთის მადლით! ასე იყო და ასე იქნება მუდამ!

ახლა მინდა, საჯაროდ გადავუხადო მადლობა ჩემთვის გაწეული მადლისათვის იმ კონკრეტულ ადამიანებს, რომლებიც არაფრით იყვნენ დავალებული ჩემგან, ყველას ვერ ჩამოვთვლი და ვთხოვ მათ, ვინც ვერ ჩამოვთვალე თავისადაც მიიღონ ჩემი მადლიერება. აი ისინი: აკაკი ზერეკიძე, კობა შუბითიძე, გივი ზვედელიძე, სიმონ ნოზაძის ოჯახი, ბიძინა გუგუბიძის ოჯახი, იზო პაქსაშვილი, თამაზ ლაცაბიძე. ღმერთმა სიკეთით გადაუხადოს მათ და არც მომავალში მოაკლოთ ქველმოქმედების შემძლეობა და სურვილი.

ქელს ვიხრი ყველა ჭეშმარიტი ქველმოქმედის წინაშე, ვინც არ უნდა იყვნენ და სადაც უნდა იყვნენ ისინი!

ზურაბ ცუცქერიძე



სოფელ ქვიშხეთში დასუფთავების აქცია მოენყო

ა(ა)იპ "ხაშურსერვისის" და სოციალური პროგრამის ფარგლებში დასაქმებულთა ჩართულობით, ქვიშხეთში მისასვლელი გზა დასუფთავდა.

დასუფთავების აქციები მუნიციპალიტეტში სისტემატურ ხასიათს ატარებს.

სასიამოვნოა, რომ მსგავსი აქციები მთელი მუნიციპალიტეტის მასშტაბით მიმდინარეობს, რომლის საბოლოო მიზანი ეკოლოგიურად სუფთა გარემოს შექმნაა.



მოქალაქეთა საყურადღებოდ!



ხაშურის მუნიციპალიტეტის მერია გაფრთხილებთ, რომ სსიპ გარემოს ეროვნული სააგენტოს საინჟინრო-გეოლოგიური დასკვნის საფუძველზე, მდინარე მტკვარზე, სოფელ ხალებთან დამაკავშირებელი ხიდი ავარიულ მდგომარეობაშია და კატეგორიულად აკრძალულია მისი ექსპლუატაცია.

გთხოვთ, ისარგებლოთ შემოვლითი გზით სოფლების: თაგვეთისა და ხცისის მხრიდან.

მუნიციპალიტეტის მერია აგრძელებს ინტენსიურ მუშაობას ამ საკითხზე.

დამატებითი ინფორმაციისთვის მიმართეთ მუნიციპალიტეტის მერიას.

ცელი ნაზი: 0368241502



გზა კეთილმოეწყო

დასრულდა ხაშურისა და სურამის დამაკავშირებელი (შუშის ქარხნის დასახლების მიმდებარედ) გზის სამუშაოები.

აღნიშნული გზით სურამთან დაკავშირება უკვე უსაფრთხო და კომფორტულია.

აღსანიშნავია, რომ მუნიციპალიტეტის თხოვნით მოწესრიგდა შუშის ქარხნის დასახლებისა და შინდარის უბნის დამაკავშირებელი მცირე საფეხმავლო მონაკვეთიც, რაც პროექტით გათვალისწინებული არ იყო.

სურამში, ბაიანთხევის უბანში, წყალმომარაგების სისტემის რეაბილიტაცია გაგრძელდება

ხაშურის მუნიციპალიტეტის მერიამ არაერთი შეკითხვა თუ პირადი შეტყობინება მიიღო სურამში, ბაიანთხევის უბანში, წყალმომარაგების სისტემის რეაბილიტაციასთან დაკავშირებით.

როგორც რამდენიმე დღის წინაც გამოვამყვანეთ, რეგიონული განვითარებისა და ინფრასტრუქტურის სამინისტროს გაერთიანებული წყალმომარაგების კომპანია, ხაშურის მუნიციპალიტეტის დაბა სურამში, წყალმომარაგების სისტემის რეაბილიტაციას აგრძელებს.

შესაბამისი სამუშაოების გაგრძელების ხელშეკრულებას ხელი წყალმომარაგების კომპანიის დირექტორის მოადგილემ, ნინო ნაროზაშვილმა და ტენდერში გამარჯვებული კომპანია, შპს „უნივერსალ სერვისი“-ის დირექტორმა იოსებ ბაზღაძემ მოაწერეს.

პროექტის ფარგლებში გვერდისუბნისა და ბაიანთხევის უბნებისთვის ეწყობა წყალმომარაგების ქსელები და რეზერვუარი. დამატებით, დაბა სურამისთვის მოეწყობა სატუმბო სადგური.

პროექტით გათვალისწინებულ სამუშაოებს სახელმწიფო ბიუჯეტიდან 4 მლნ ლარი მოხმარდება.

პროექტის განხორციელების შედეგად, დაბა სურამში წყალმომარაგების კომპანიის აბონენტები, სტაბილური და ხარისხიანი წყალმომარაგებით იქნებიან უზრუნველყოფილნი.

მუნიციპალიტეტის მერია



საქართველოს რეგიონული განვითარებისა და ინფრასტრუქტურის სამინისტრო

საპროექტო სამუშაოების დასრულებისთანავე დაიწყება მუშაობა უშუალოდ ნაპირსამაგრი სამუშაოების განხორციელებაზე კანონმდებლობით დადგენილი შესაბამისი პროცედურების დაცვით.

ამასთან, მუნიციპალიტეტის მერია მჭიდრო კომუნიკაციაშია სოფლის მეურნეობისა და გარემოს დაცვის სამინისტროს შესაბამის სამსახურთან, რათა პროექტით გათვალისწინებული სამუშაოები დაიგეგმოს და განხორციელდეს კომპეტენტური ორგანოს მიერ გაცემული კვალიფიციური გეოლოგიური დასკვნის საფუძველზე.

შესაბამისად, საფუძველს მოკლებულია განცხადება, რომ მუნიციპალიტეტი არ დაინტერესებულა სოფელ ვაყაში არსებული მეწყერსაშიში ვითარებით.

მუნიციპალიტეტის მერია

ვაყაში, მეწყერსაშიში ტერიტორიაზე, გამაგრებითი სამუშაოები უახლოეს მომავალში დაიწყება

ხაშურის მუნიციპალიტეტის მერია ეხმაურება TV ივერიას ეთერში გასულ ვიდეომასალას სოფელ ვაყაში მეწყერსაშიში ვითარების შესახებ, სადაც აღნიშნულია, რომ მუნიციპალიტეტიდან ამ საკითხით არავინ დაინტერესებულა.

გვსურს განვმარტოთ, რომ სოფელ ვაყაში მეწყერსაშიში სიტუაციის მოგვარების მიზნით მუნიციპალიტეტის მერიას გამოცხადებული აქვს მიმდინარე ტენდერი დაზიანებული ნაპირსამაგრი/ნაპირდამცავი კედლების მშენებლობა/რეაბილიტაციის საპროექტო-სახარჯთაღრიცხვო დოკუმენტაციის შედგენის შესახებ.

- იუმორი -

(ნამდვილი ამბავი)

პატრიკ თაიმსი - გაქართველებული ამერიკელი

„მშვიდობის კორპუსს“ ჩამოყოლილი პატრიკ თაიმსი ამ 5 წლის წინ გამოჩნდა ხაშურში. ჯერ სკოლაში იმოღვაწეა და მოსწავლეებს ინგლისურს ასწავლიდა, 6 თვის გასვლის შემდეგ კი, რაის ამერიკა, აქედან წამსვლელი მე არ ვარო და კიდევ 3 წელი დარჩა ხაშურში. „აღფრთოვანება“ ის სიტყვა არ არის, რასაც პატრიკი ჩვენი ქალაქის და, ზოგადად, ქართველების მიმართ გამოხატავდა. პედაგოგობასთან ერთად მხატვრობა შეითავსა და ქალაქში დღესაცაა შემორჩენილი მისი კედლის მხატვრობები. პარალელურად, ქართველობას ითვისებდა. სამი წლის შემდეგ, იმდენად „გაქართველდა“, ენას ხომ სწლავდა, ტრადიციებიც აითვისა და ერთი სიამოვნება იყო იმის ცქერა, სუფრას როგორ თამადაობდა. როგორი ამბავია, ამერიკელი რომ წამოდგება და იტყვის: ჩვენს წინაპრებს გაუმარჯოს, ფარნავაზიდან მოყოლებული და ილიათი დამთავრებულიო. ამ „ჩვენს“ მართლა გულით ამბობდა და ეს იყო სასიხარულო. შეიძლება იმ „ჩვენში“ თავის „ჩვენსაც“ გულისხმობდა, თუმცა ხმამაღლა არ ამბობდა. ან რომ ეთქვა, მაშინ ინდიელთა ბელადი მონტესუმა და მისნაირები უნდა ეხსენებინა და ხვდებოდა, თამარ მეფესთან, დავით აღმაშენებელთან და სხვებთან მათი გაიგივება, რბილად რომ ვთქვათ, უხერხული იქნებოდა. მოკლედ, კაი ქართველი „პურისმჭამელი“ დადგა ეს ჩვენი პატრიკი. ბოლოსდაბოლოს, ამოეწურა ვადები პატრიკს და დაბრუნდა თავის

ამერიკაში. თუმცა, ურთიერთობა რა შეუწყვეტავს ხაშურლებთან. კვირაში ერთხელ მაინც ეხმიანებოდა და იყო ერთი მიკითხვა - მოკითხვები. ერთ-ერთი ზარი კი ნოემბრის დასაწყისში განხორციელდა. პატრიკი ცოტა აღელვებული რეკავდა მოკითხვა არც დაუწყია და პირდაპირ საქმეზე გადავიდა: კაცო (ასე იწყებდა საუბარს), ველარ გავიგე რა ვქნა, ორასი სუფთა ჩავასხი, ასი - ჭაჭაზე დავაყენე, ორივე დადულდა და უკვე უნდა გადავიღო თუ ცოტა ვაცადო... რეკომენდაციების ბოლოს კი დაამატა: ზაფხულში მოვდივარ, ოციანი მომაქვს, უნდა გაგასინჯოთ, ღვინო ჩემი და „ცოცხალი“ თქვენო...

ჰოდა, ელოდებიან ამ ზაფხულში. როგორი საყურებელი იქნება, სუფრის თავში რომ დასვამენ და ყანწით ხელში კაი „ჩაკრულოსაც“ დასცხებს ეს მართლა ჩვენი პატრიკი.

გოგი გოგოლაძე



„ლედი“ - გერმანული ნაგაზის მეტისი, რომელიც ფეხბურთზე გიჟდება

კაცი რომ ექვსათეულ წელს „ჩააგრილებს“, ათას ქარტეხილში გაივლის, თავზე დოლაბს არ დაიტრიალებს, მაგრამ არც უდოლაბოდ უვლია ეს წლები,



კი იტყვის - აწი რამ უნდა გამაკვიროსო, მაგრამ, თურმე, სად ხარ! ზედმეტი შესავალ-შემოსავლებით, რომ არ დავღალო მკითხველი, პირდაპირ სათქმელზე გადავალ: ძაღლის მეტი რა მინახავს ცხოვრებაში - ყველა ჯიშის, გენის თუ „ეროვნების“ შეფარას „გავცნობივარ“, ან, ბოლოსდაბოლოს, ენციკლოპედიურ ცნობარებში მომიძიება ინფორმაციები მათ შესახებ. გავუოცებივარ მათ უსაზღვრო ნიჭს, როდესაც გარკვეული წვრთნის შემდეგ, საოცარ შესაძლებლობებს ავლენენ, მაგრამ არსად მინახავს, რა მინახავს, არც მსმენია, რომ ძაღლი ფეხბურთზე იყოს გადარეული. მეეჭვება, ამ „არმნახველთა“ სიაში მარტო მე ვიყო. დარწმუნებული ვარ, აბსოლუტური უმრავლესობა ასე. თუმცა, არა ჩვენი ქალაქის მცხოვრებლები,

რომლისთვისაც ფეხბურთზე გაგჟებული ძაღლი უკვე ჩვეულებრივი მოვლენაა.

„ლედი“ ყველა იცნობს ხაშურში. ნუ, თუ ყველა არა, ნახევარი ქალაქი - ნამდვილად. „ლედი“ გერმანული შავი ნაგაზის მეტისია, რომელიც ამ 2-3 წლის უკან გამოჩნდა ქალაქის ქუჩებში. არავინ იცის, საიდან მოვიდა, არც მისი „ბიოგრაფია“ ცნობილი, თუმცა ის კი ყველამ იცის, რომ ესაა მსოფლიოში ალბათ, ერთადერთი ძაღლი, რომლისთვისაც ფეხბურთი ცხოვრების ნაწილია. უფრო დავკონკრეტლები: ფეხბურთი და ხაშურის „ივერია“. აი, ასე - არც მეტი, არც ნაკლები!

ყველასთვის ამოუხსნელი ფენომენია, როგორ გებულობს მატჩის დღეს. და რომ გებულობს ფაქტია: თუ დანარჩენ დღეებში „ლედი“ კონტურსაც ვერ დაინახავთ „ივერიის“ სტადიონის მიმდებარედაც კი, მატჩის დღეს, დილის 9 საათიდან, „ლედი“ უკვე სტადიონზეა. თვალში აუხსნელი სიხარული უბრწყინავს და მოთმინებით უცდის თამაშის დაწყებას. მერე რა, რომ ასე ადრე მივიდა, მერე რა რომ თამაშამდე ამდენი დროა დარჩენილი. მანამდე ათასი საქმეა. ჯერ სტადიონის მომწესრიგებლებს უნდა დაეხმაროს - ან ხაზი იყოს გასავლები, ან ბაღე მოსაწესრიგებელი. ყველას გვერდითაა - მიყვება და მოყვება. მერე ივერიელებიც გამოჩნდებიან - გასახდელამდე ხომ უნდა მიაცილოს? მერე, სავარჯიშოდ გამოსულებს მინდვრამდე ხომ უნდა უკავალროს? აბა, რა! იცი, რომ მის გარდა ამ საქმეს არავინ გააკეთებს.

და აი, იწყება თამაში და იწყება „ლედი“ შოუც“. ერთხელ გააფრთხილეს, რომ თამაშის დროს, მინდორზე შევარდნა უხნობაა და იმის შემდეგ ამას აღარც კადრულობს. მოედანს შემოვლებული რკინის ბადეების მიღმა ტერიტორიაა მისი არეალი. მთელი ორი ტაიმი სადაც ბურთია, იმ მხარესაა „ლედიც“, რა ენერჯია აქვს ასეთი, მაგრამ „ივერიის“ და ფეხბურთის სიყვარული აძლევს ამ ენერჯიას. გოლის მომენტი კი მისი შოუს მწვერვალია - რამდენიმე მალაყის შემდეგ, ღობეზე შემოდებს თათებს და ხმამაღალი ყფით ულოცავს გოლის გამტანს. თუ ჩვენს ფეხბურთელს უხეშად ეთამაშნენ, ეს კიდევ ცალკე სანახაობაა: გამწარებული აწყდება ცხაურს და პირდაპირ ყფით ეუბნება დამნაშავეს, თუ ხელში ჩაგივდე, ისე დაგკებენ, მთელი ცხოვრება დაგამახსოვრდებაო.

აი, ასეთია ჩვენი „ლედი“. ახლა მას კუთვნილი შვებულება აქვს - ჯერ ახალი სეზონი არ დაწყებულა. სადაც ათ დღეში კი პირველი თამაშებიც დაიწყება და „ლედიც“ საკუთარ ადგილს დაიკავებს. სიმართლე გითხრათ, სულ ცოდილო და „ივერიის“ მუდმივი გულშემატკივრები ისე შევეჩვიეთ „ლედი“ შოუებს“, მის გარეშე რაღაც ხიბლი დააკლდება კიდევ თამაშს.

დაბოლოს, გულშემატკივრებმა ის რთული თეორემაც გაშიფრეს - როგორ გებულობს მატჩის დღეს და საათს „ლედი“? ეს ერთი ძველი გულშემატკივრისაგან მოვისმინე და იუმორთან ერთად, შეიძლება სიმართლის მარცვალი ერიოს მის ნაამბობში: „ლედი“ ქალაქში გამოკრულ „ივერიის“ თამაშის ანონსის აფიშისთან იყო ჩატუტკული და მთელი ათი წუთი მისჩერებოდა, მე მგონი, კითხულობდაო...

აი, ასე! თუ იაზონელებს ის ცნობილი „აჩი“ ჰყავდათ, რომელიც რკინიგზის სადგურზე ათი თუ თორმეტი წელი ელოდა პატრონს, ჩვენ „ლედი“ გყავს „ლედი“, რომლისთვისაც ფეხბურთი სიცოცხლეზე მეტია.

გოგი გოგოლაძე

- აპოლონიადა- 2023 -

ხაშურელი ბავშვების დიდი წარმატება საერთაშორისო ფესტივალზე

19 მარტს ქუთაისში, ოპერის თეატრში საერთაშორისო ფესტივალი „აპოლონიადა 2023“ ჩატარდა, სადაც მონაწილეობა მიიღეს რეგიონების ვოკალურმა და ქორეოგრაფიულმა ანსამბლებმა.

„ფესტივალზე „აპოლონიადა 2023“ ხაშურის მუნიციპალიტეტის მერიის და ააიპ კულტურის, ბავშვთა და მოზარდთა შემოქმედებითი განვითარების ცენტრების გაერთიანების ფინანსური მხარდაჭერით და ტრანსპორტირების ხარჯების დაფინანსებით, ხაშურის შემოქმედებითი ცენტრის ვოკალური ჯგუფი „თოლია“, გაემგზავრა პედაგოგ ღია იმერლიშვილის ხელმძღვანელობით. გოგონათა და ვაჟთა ვოკალური ჯგუფი უმცროსმა და უფროსმა თაობებმა წარმოადგინეს. შეასრულეს საესტრადო სიმღერები, 4 ნომერი. პატარების ჯგუფმა წარმოადგინეს ყანჩელის „ქაფჩა და აგური“ და ვახო კახიძის „ანო და ვანო“. უფროსებმა კი ცაბაბაძის „ჩემო თბილის ქალაქო“ და ყანჩელის „ის აქ არი“. ვოკალურმა ჯგუფმა ღირსეულად წარადგინა ხაშურის რაიონი, ვოკალური ჯგუფი „თოლია“, მხურვალე აპლოდისმენტებით, სამახსოვრო სიგელებით, მედლით და ვარსკვლავით დაგვიბრუნდა.

„როგორც წარმატებულ ჯგუფი, რომელიც ღირსეულად წარსდგა ფესტივალზე, ყველა ბავშვისათვის გადმოგვეცა დიპლომები, და ჯგუფს კი ვარსკვლავი. დიპლომით დაჯილდოვდა ასევე ჯგუფის პედაგოგი და მიგვიწვიეს ერევანში საერთაშორისო ფესტივალზე ამ ზაფხულს. იმედია, რომ წასვლას შევძლებთ. რა თქმა უნდა შეუდარებელი იყო ემოციები. კმაყოფილები და აღფრთოვანებულები იყვნენ ბავშვები, მშობლები, შთმბეჭდავი იყო მათთვის ოპერის დიდ სცენაზე სიმღერა... შეიძლება ითქვას, რომ პანდემიის შემდეგ მათთვის პირველი სასცენო გამოსვლა იყო. ვგებავთ აქტიურ მუშაობას ვოკალური ჯგუფი, მონაწილეობას სხვადასხვა აქტივობებში, მონდომებულნი არიან ბავშვებიც...“ - ამბობს პედაგოგი ღია იმერლიშვილი.

ფესტივალ „აპოლონიადა 2023-ში“ ვოკალურ ჯგუფ „თოლიასთან ერთად გაემგზავრა მონაწილეობის მისაღებად ხაშურის შემოქმედებითი ცენტრის ვოკალური ჯგუფი „ქართლი“ გოგი შუბითიძის ხელმძღვანელობით, რომელმაც ასევე ღირსეულად წარადგინა ჩვენი ქალაქი. ვოკალური ჯგუფი „ქარ-



თლიც“ მხურვალე აპლოდისმენტებით, სამახსოვრო სიგელებით, მედლით და ვარსკვლავით დაჯილდოვდა.

თეა ახალაკცი

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.
E-mail khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.
P-ით მონიშნული სტატია იბეჭდება დაკვეთით გაზეთი იბეჭდება თბილისში.